

S T A T U T

**OTVORENOG INVESTICIJSKOG FONDA
SA JAVNOM PONUDOM**

„EUROHAUS BALANCED“

U skladu sa članovima 106. i 108. Zakona o investicijskim fondovima (“Službene novine Federacije BiH”, broj 85/08), Nadzorni odbor Društva za upravljanje fondovima „EUROHAUS INVEST“ d.o.o. Sarajevo, na sjednici održanoj dana 11. 12. 2009. godine, donosi

S T A T U T

OTVORENOG INVESTICIJSKOG FONDA SA JAVNOM PONUDOM „EUROHAUS BALANCED“

OPŠTE ODREDBE

Član 1.

Ovim Statutom uređuju se uslovi i pravila poslovanja Otvorenog investicijskog fonda sa javnom ponudom „EUROHAUS BALANCED“ (u daljem tekstu: Fond), te pravni odnos „EUROHAUS INVEST“ Društva za upravljanje fondovima d.o.o. Sarajevo (u daljem tekstu: Društvo) sa vlasnicima udjela u Fondu.

Ovaj Statut ne sadrži nužno one podatke i/ili informacije koji su navedeni u Prospektu Otvorenog investicijskog fonda s javnom ponudom „EUROHAUS BALANCED“ (u daljem tekstu: Prospekt), te se potencijalnim ulagačima i vlasnicima preporučuje da u cjelosti i detaljno pročitaju sadržaj Prospekta.

Statut Fonda prilaže se Prospektu i čini njegov sastavni dio.

Iznimno, Statut ne mora biti priložen Prospektu u slučaju da Prospekt predviđa da će vlasniku Statut biti dostavljen na njegov zahtjev, odnosno mjesto gdje će Statut biti dostupan na uvid.

NAZIV FONDA

Član 2.

Naziv Foda:	Otvoreni investicijski fond sa javnom ponudom „EUROHAUS BALANCED“
Skraćeni naziv Fonda:	OIF „EUROHAUS BALANCED“
Strani naziv Fonda:	„EUROHAUS BALANCED“ Open-end Mutual Fund
Sjedište fonda:	Sarajevo, Azize Šaćirbegović16

OSNIVANJE I VRIJEME TRAJANJA FONDA

Član 3.

Fond je osnovalo i njime upravlja „EUROHAUS INVEST“ Društvo za upravljanje fondovima d.o.o. Sarajevo. Fond je osnovan na osnovu odluke Nadzornog odbora Društva br:58-II-1/08 od 07. 02. 2008. godine na neodređeno vrijeme i može prestati samo u slučajevima i na način određen Zakonom o investicijskim fondovima („Službene novine FBiH“, br. 85/08; u daljem tekstu: Zakon).

Kao datum osnivanja Fonda uzima se dan izdavanja odobrenja od strane Komisije za vrijednosne papire FBiH. Rad Fonda odobren je Rješenjem Komisije za vrijednosne papire FBiH br. 05-19-74/08 od 14. 02. 2008. godine.

DOSTUPNOST INFORMACIJA O FONDU

Član 4.

Primjerak Statuta i Prospekta Fonda, te polugodišnje i godišnje izvještaje o radu Fonda kao i sve druge informacije o Fondu mogu se dobiti u sjedištu „EUROHAUS INVEST“ d.o.o. Sarajevo, Azize Šaćirbegović br. 16 Sarajevo, svakim radnim danom od 8:00 do 16:00 sati, ili na web stranici Društva www.eurohaus-invest.ba.

PRIKUPLJANJE I ULAGANJE NOVČANIH SREDSTAVA

Član 5.

Novčana sredstva Fonda prikupljaju se izdavanjem udjela u Fondu javnom ponudom i prodajom udjela svim zainteresovanim ulagačima, u skladu sa odredbama Zakona, Prospekta i ovog Statuta. Sredstva Fonda ulagat će se na lokalnim, regionalnim i međunarodnim tržištima kapitala i novca, u skladu sa odredbama Zakona, Prospekta i Statuta. Pri ulaganju sredstava Društvo će se pridržavati ograničenja utvrđenih Zakonom.

Član 6.

Vrijednost imovine otvorenoga investicijskog fonda s javnom ponudom ne smije pasti ispod 1.000.000,00 KM tokom tri uzastopna kalendarska mjeseca, a ako se to dogodi, fond mora biti likvidiran ili pripojen nekom drugom fondu.

PRAVA IZ UDJELA FONDA

Član 7.

Prava iz udjela u Fondu vlasnici udjela stiču upisom u registar udjela koje vodi Društvo.

Prava iz udjela u Fondu koji pripadaju vlasnicima udjela su:

- pravo na obavještenost (polugodišnji i godišnji izvještaji),
- pravo na udio u dobiti,
- pravo na prodaju udjela Fondu, odnosno obaveza otkupa udjela,
- pravo na isplatu dijela ostatka likvidacione, odnosno stečajne mase Fonda.

Prava iz udjela vlasnici udjela ostvaruju u skladu sa Zakonom, Prospektom i Statutom Fonda.

OPIS INVESTICIJSKIH CILJEVA I CILJANA STRUKTURA PORTFELJA

Član 8.

OIF „EUROHAUS BALANCED“ je mješoviti otvoreni investicijski fond, čija će struktura ulaganja biti formirana od podjednake izloženosti vlasničkim i dužničkim vrijednosnim papirima.

Fond je po svojoj prirodi dugoročno umjereno rizičan. Osnovni investicijski ciljevi Fonda su: sigurnost, likvidnost i postizanje atraktivnog prinosa na uložena sredstva, imajući u vidu nivo izloženosti potencijalnim rizicima.

Član 9.

Imovina Fonda ulaže se u sljedeće instrumente (procenti se odnose na učešće u neto vrijednosti imovine Fonda):

- **do 70%** imovine Fonda u dionice kojima se trguje na berzama ili drugim uređenim javnim tržištima u Bosni i Hercegovini, državama članicama EU, berzama u državama članicama OECD, CEFTA i berzama ili drugim uređenim javnim tržištima ostalih država koje nisu članice CEFTA, EU i OECD,
- **do 70%** imovine Fonda u obveznice i kratkoročne vrijednosne papire kojim se trguje na berzama ili drugim uređenim javnim tržištima u Bosni i Hercegovini, državama članicama EU, državama članicama OECD i državama članicama CEFTA,
- **do 50%** imovine Fonda u depozite u financijskim institucijama,
- **do 10%** imovine Fonda u udjele ili dionice investicijskih fondova uz uslov da je prospektom i/ili statutom fonda u čije se dionice ili udjele ulaže predviđeno da najviše 10% imovine fonda može biti uloženo u dionice ili udjele drugih fondova i da je nivo zaštite investitora i obaveza izvještavanja najmanje jednaka propisima u FBiH. Maksimalna naknada za upravljanje koja se može naplatiti na imovinu fondova u koje namjerava Fond ulagati iznosi 3,5%,
- **do 10%** u vrijednosne papire emitena iz Bosne i Hercegovine, država članica CEFTA, EU i OECD, koji nisu uvršteni na službeni (redovnu) kotaciju za prodaju na nekoj od berzi vrijednosnih papira ili se ne prodaju na nekom drugom organizovanom tržištu u Bosni i Hercegovini, državama članicama CEFTA, EU i OECD, a u skladu sa zakonskim propisima,
- **do 5%** u opcijske i termenske ugovore i druge finansijske derivate kojima se trguje na organizovanim tržištima u Bosni i Hercegovini, državama članicama EU, ostalim državama članicama OECD i državama članicama CEFTA, a u skladu sa zakonskim propisima.

Dozvoljeno je ulaganje više od 35% neto vrijednosti imovine Fonda u prenosive vrijednosne papire i instrumente tržišta novca čiji su emitenti ili za koje garantuje Federacija, Republika Srpska, Bosna i Hercegovina ili jedinica lokalne samouprave Federacije, Republike Srpske, i država i jedinice lokalne uprave država članica EU, Evropska banka za obnovu i razvoj (EBRD), Menunarodna banka za obnovu i razvoj (IBRD) ili Evropska investicijska banka (EIB).

Ulaganje u opcijske i termenske ugovore i druge finansijske derivate će se koristiti u svrhu zaštite od rizika ulaganja u konkretne vrijednosne papire i smanjenja troškova Fonda. Ulaganjima u finansijske derivate investicijska strategija Fonda se neće mijenjati, niti će se povećati izloženost rizicima iznad onih definiranih ovim Prospektom ili Zakonom. Ulaganje u finansijske derivate je dozvoljeno i u slučajevima kada njihova upotreba omogućava dostizanje boljih ciljeva investiranja.

Član 10.

Strateška teritorijalna alokacija ukupnih sredstava Fonda je :

- Bosna i Hercegovina i ostale države članice CEFTA, do 100%,
- EU i ostale države članice OECD, do 70% i
- države nečlanice CEFTA, EU i OECD, do 50 % imovine Fonda.

Pri ulaganju sredstava Fonda, „EUROHAUS INVEST“ d.o.o. će se pridržavati ograničenja iz Zakona, Prospekta i ovog Statuta.

RIZICI POVEZANI SA ULAGANJIMA

Član 11.

Ulaganjem u Fond ulagači preuzimaju određene rizike usljed čijeg djelovanja prinos na ulaganje u Fond može biti nezadovoljavajući ili negativan. Ulagačima se, u cilju smanjenja rizika, preporučuje dugoročniji pristup ulaganju. S obzirom na investicijsku politiku Fonda, nezadovoljavajući ili negativan prinos na ulaganje u Fond može nastati kao posljedica sljedećih rizika:

- Tržišni rizik,
- Državni i politički rizik,
- Rizik likvidnosti,
- Valutni rizik,
- Kreditni rizik,

- Rizik promjena kamatnih stopa,
- Rizik promjena poreznih propisa,
- Rizici specifični Fondu.

NAJNIŽI IZNOS ULAGANJA U FOND

Član 12.

Minimalna pojedinačana prva uplata u Fond je 200,00 KM, svaka sljedeća uplata može biti i u nižem iznosu, ali ne manje od 50,00 KM.

Početna vrijednost jednog udjela iznosila je 10,00 KM (slovima: deset KM).

KUPOVINA I OTKUP UDJELA U FONDU

Član 13.

Ulagač kupuje udjele u Fondu na način da Društvu dostavi zahtjev za kupovinu udjela, te da uplati novčana sredstva na račun Fonda. Kupovina udjela se obavlja po vrijednosti udjela važećoj na dan priliva novčanih sredstava. Iznos uplate se umanjuje za iznos ulazne naknade shodno odredbama Prospekta.

Vlasniku čija su sredstva pristigla na račun Fonda do 14:00 sati pojedinačnog dana (t), za preračun uplaćenih sredstava u udjele priznaje se cijena udjela na taj dan, utvrđena sljedeći radni dan (t+1). Sve uplate koje su prispjele na račun Fonda poslije 14:00 sati u toku dana računaju se kao uplate sljedećeg radnog dana (t+1).

Član 14.

U slučaju da ulagač želi prodati svoj udjel u Fondu, to radi na način da Društvu dostavi zahtjev za prodaju udjela u kojem navodi koliko udjela želi prodati. Otkup udjela se obavlja po vrijednosti udjela važećoj na dan podnošenja zahtjeva za otkup udjela Fonda (t), ukoliko je zahtjev za otkup zaprimljen do 14:00 sati tog radnog dana, a koja se utvrđuje sljedeći radni dan (t+1). Ukoliko se zahtjev podnese poslije 14:00 sati u toku radnog dana, za obračun otkupne vrijednosti udjela priznaje se cijena udjela za naredni dan (t+1) u odnosu na dan podnošenja zahtjeva za otkup udjela.

Društvo obavlja isplatu otkupne vrijednosti udjela po cijeni udjela umanjenoj za izlaznu naknadu u skladu sa Prospektom, najkasnije sedam radnih dana od dana zaprimanja valjanog zahtjeva za otkup. Za isplate u inostranstvo troškove konverzije i transfera isplaćenih sredstava snosi podnosioc zahtjeva za prodaju.

OBUSTAVLJANJE OTKUPA I IZDAVANJA UDJELA U FONDU

Član 15.

Odlukom Društva otkup udjela u Fondu može se obustaviti u slučajevima kada Društvo, uz saglasnost banke depozitara, smatra da usljed izuzetnih okolnosti nije moguće utvrditi tačnu cijenu imovine iz portfelja Fonda te da postoje osnovani i dovoljni razlozi za obustavu otkupa u interesu vlasnika ili potencijalnih vlasnika udjela u Fondu. U slučaju nastupa okolnosti obustavljanja otkupa udjela Društvo će obustaviti i izdavanje udjela u Fondu.

Obustavljanje otkupa i izdavanja udjela u Fondu Društvo je dužno prijaviti Komisiji za vrijednosne papire u FBiH.

Član 16.

Obustava otkupa i izdavanja udjela u Fondu prestat će nakon što Društvo i banka depozitar ocijene da je moguće odrediti tačnu cijenu imovine iz portfelja Fonda, a najkasnije u Zakonom propisanim rokovima.

Obavijest o obustavi kao i obavijest o nastavku poslovanja Fonda, Društvo će objaviti u jednim dnevnim novinama koje se izdaju na teritoriju FBiH.

UTVRĐIVANJE VRIJEDNOSTI IMOVINE FONDA I CIJENE UDJELA

Član 17.

Utvrdjivanje neto vrijednosti imovine i cijene udjela Fonda obavlja se u skladu sa Zakonskim propisima, Prospektom i Statutom.

Član 18.

Društvo utvrđuje neto vrijednost imovine i vrijednost udjela Fonda, a nadzor nad njihovim utvrđivanjem obavlja i odgovornost za tačnost obračuna ima banka depozitar Fonda. Neto vrijednost imovine otvorenog investicijskog fonda jest tržišna vrijednost imovine fonda, umanjena za obaveze Fonda. Vrijednost imovine Fonda Društvo izračunava svakog radnog dana za prethodni dan, najkasnije do 16:00 sati.

Član 19.

Cijena udjela Fonda izračunava se svaki dan dijeljenjem neto vrijednosti imovine Fonda s brojem izdanih, a nepovučanih udjela na dan utvrđivanja neto vrijednosti. Broj izdatih udjela jednak je broju udjela u trenutku izračuna, uzevši u obzir prodaju i otkupe izvršene od trenutka zadnjeg izračuna cijene udjela do trenutka izračuna nove cijene udjela.

Vrijednost imovine Fonda i cijena udjela se objavljuju svakodnevno na web stranici Društva www.eurohaus-invest.ba i na raspolaganju su bilo kojem ulagaču koji to zatraži lično, telefonom, putem pošte ili elektronskim putem na adresu Društva.

NAKNADE I TROŠKOVI UPRAVLJANJA FONDOM

Član 20.

Za vrijeme ulaganja, vlasnicima odnosno imovini Fonda zaračunavaju se sljedeće naknade/troškovi u skladu sa odredbama Prospekta:¹

1. ulazna i izlazna naknada,
2. naknada Društvu za upravljanje,
3. troškovi koji se mogu knjižiti izravno na teret vlasnika ili imovine Fonda u stvarnoj visini, a to su:
 - naknada i troškovi koji se plaćaju banci depozitaru,
 - troškovi i provizije vezane uz sticanje ili prodaju imovine,
 - troškovi vođenja registra udjela, uključujući troškove izdavanja – dostave potvrda o kupovini/otkupu ili stanju udjela, ako je to potrebno, te troškove isplate udjela u dobiti,
 - troškovi godišnje revizije,
 - troškovi izrade, štampanja i poštarine vezani uz polugodišnje i godišnje izvještaje vlasnicima udjela,
 - sve propisane naknade koje se plaćaju Komisiji,
 - porezi koje je Fond dužan platiti na svoju imovinu ili dobit,
 - troškovi objave izmjena Prospekta, Statuta i drugih propisanih obavijesti, i
 - ostali troškovi određeni posebnim zakonima, Statutom i Prospektom Fonda.

Ulazne i izlazne naknade, te naknade Društvu za upravljanje su prihod Društva.

¹ Uvećani za porez ako postoji porezna obaveza

Za druge usluge koje nisu definisane Zakonom, a za koje vlasnik udjela uputi zahtjev, Društvo ima pravo naplatiti ulagaču fiksnu naknadu po zahtjevu podnesenom putem pošte ili prodajnog mjesta. Podnositelju koji zahtjev lično dostavi Društvu, Društvo odmah i bez naknade obavlja zahtijevanu uslugu. Plaćanje naknade vlasnik udjela obavlja uplatom na transakcijski račun Društva. Uputstva za podnošenje zahtjeva i obavljanje uplate su dostupna na ovlaštenim prodajnim mjestima i na web stranici www.eurohaus-invest.ba.

Ukupni iznos svih troškova koji se knjiže na teret Fonda ne smije prelaziti 3,5% prosječne godišnje neto vrijednosti imovine Fonda. Sve nastale troškove koji u određenoj godini pređu 3,5% snosi Društvo.

OBAVJEŠTAVANJE VLASNIKA

Član 21.

Društvo će vlasnike obavještavati o: cijeni udjela, polugodišnjem i godišnjem finansijskom izvještaju, prenosu upravljanja Fondom na drugo društvo za upravljanje, izmjenama Prospekta i/ili Statuta Fonda, te obustavi otkupa udjela i njihovom izdavanju.

Smatrat će se da je Društvo obavijestilo vlasnike o podacima iz prethodnog stava, ukoliko su ti podaci objavljeni i/ili učinjeni dostupnima u skladu sa odredbama Zakona, i ako Zakon propisuje da se isti podaci ne moraju dostavljati vlasnicima.

Član 22.

Društvo će za Fond objaviti zasebno polugodišnji i godišnji finansijski izvještaj, u skladu sa zakonskim propisima i međunarodnim standardima finansijskog izvještavanja. Polugodišnji izvještaji i revidirani godišnji izvještaji kao i dodatne informacije o Fondu biće dostavljeni vlasnicima udjela u Fondu, isključivo na njihov zahtjev.

Polugodišnji izvještaji dostavljaju se Komisiji u roku od dva mjeseca od završetka obračunskog razdoblja. Revidirani godišnji izvještaji dostavljaju se Komisiji u roku od četiri mjeseca od završetka obračunske godine. Društvo će Komisiji dostavljati i periodične izvještaje u skladu sa zakonskim propisima.

PODJELA DOBITI

Član 23.

Društvo ne isplaćuje udio u dobiti Fonda vlasnicima udjela, već se dobit Fonda reinvestira. Dobit Fonda sadržana je u cijeni jednog udjela, a vlasnici udjela realiziraju dobit tako da djelomično ili u potpunosti prodaju svoje udjele u Fondu u skladu sa odredbama Prospekta Fonda.

POREZNI TRETMAN FONDA I ULAGAČA

Član 24.

Imovina Fonda teretit će se i za sve eventualne porezne obaveze koje je Fond dužan platiti na svoju imovinu ili dobit, kao i za troškove regulisanja poreznih obaveza i zahtjeva za povrat navedenih poreza, u stvarnoj visini. Prema postojećim poreznim propisima u FBiH, imovina Fonda ne tereti se nikakvim poreznim opterećenjima.

Postojećim i potencijalnim vlasnicima udjela u Fondu se preporučuje individualna upućenost o mogućim poreznim posljedicama koje za njih mogu proizaći iz vlasništva nad udjelima u Fondu obzirom na mjerodavne domaće i strane porezne propise ili međunarodne ugovore sa poreznim obilježjima ili posljedicama.

TRAJANJE POSLOVNE GODINE

Član 25.

Poslovnom godinom Fonda smatra se kalendarska godina, koja počinje 1. januara i završava 31. decembra svake godine.

LIKVIDACIJA FONDA

Član 26.

Društvo će pokrenuti postupak likvidacije Fonda ukoliko nastupe okolnosti predviđene Zakonom, a posebno u sljedećim slučajevima:

- u slučaju da vrijednost imovine Fonda padne ispod 1.000.000 KM tokom tri uzastopna kalendarska mjeseca Fond mora biti likvidiran ili pripojen nekom drugom fondu,
- prilikom dobrovoljnog prestanka djelatnosti „EUROHAUS INVEST“ d.o.o. osim ukoliko Fond bude prenesen drugom ovlaštenom društvu na upravljanje,
- prilikom promjene banke depozitara kada ne bude zaključen ugovor s novom bankom depozitarom.

DEPOZITAR FONDA

Član 27.

UniCredit Bank d.d. Mostar sa sjedištem u Mostaru, ul. Kardinala Stepinca bb, je banka depozitar Fonda. UniCredit Bank d.d. Mostar je dana 14. 02. 2008. godine dobila dozvolu Komisije za obavljanje poslova depozitara br. 05/1-19-66 /08.

DRUŠTVO ZA UPRAVLJANJE FONDOM

1. Naziv i sjedište Društva

Član 28.

Fondom upravlja „EUROHAUS INVEST“ Društvo za upravljanje fondovima d.o.o. Sarajevo, sa sjedištem u sarajevu, Azize Šaćirbegović 16.

Naziv Društva:	„EUROHAUS INVEST“ Društvo za upravljanje fondovima d.o.o. Sarajevo
Skraćeni naziv:	„EUROHAUS INVEST“ d.o.o.Sarajevo
Strani naziv društva:	„EUROHAUS INVEST“ Management Company
Sjedište:	Azize Šaćirbegović 16, Sarajevo

2. Pravni oblik Društva

Član 29.

„EUROHAUS INVEST“ Društvo za upravljanje fondovima d.o.o. Sarajevo je organizirano kao društvo s ograničenom odgovornošću.

Društvo je rješenjem Komisije za vrijednosne papire FBiH br. 03/2-19-19/08 od 24. 01. 2008 .god. upisano u registar emitenata pod brojem: 04-14-3326, a rješenjem Općinskog suda od 31. 12. 2007. godine u Registar Suda pod brojem 065-0-Reg-07-003614.

3. Osnovni kapital i članovi Društva

Član 30.

Visina u sudski registar upisanog i uplaćenog osnovnog kapitala Društva iznosi 716.197,00 KM (slovima: sedamstotinašesnaesthiljadastotinudevedesetsedam i 00/100 KM).

Pojedinačni udjeli članova u osnovnom kapitalu Društva, iznose:

- Blekić (sin Osmana) Zijad, nastanjen u Sarajevu	17,00%
- Šotra (sin Milenka) Boiša, nastanjen u Podgorici	15,00%
- Kurtćehajić (sin Šefketa) Suad, nastanjen u Sarajevu	12,00%
- WVP za posredovanje i zastupanje d.o.o. Sarajevo	12,00%
- Osmić (sin Muharema) Mirsad, nastanjen u Tuzli	10,00%
- „SA Investment“ d.o.o. za konsalting i investicije, Sarajevo	7,50%
- Đugum (sin Muje) Mirsad, nastanjen u Sarajevu	5,00%
- Pehilj (sin Mahmuta) Mešan, nastanjen u Poreču	5,00%
- Brkanić (sin Seida) Faruk, nastanjen u Sarajevu	2,50%
- Brandalik (sin Slavka) Eduard, nastanjen u Tuzli	2,50%
- Filipović (kći Branimira) Jelena, nastanjena u Tuzli	2,50%
- Haseljić (sin Ibrahima) Mirsad, nastanjen u Brčkom	2,50%
- Oršolić (sin Mate) Tado, nastanjen u Brčko Distriktu	2,50%
- Avdić (kći Ferida) Sabira, nastanjena u Sarajevu	2,00%
- Bujak (kći Ramiza) Selima, nastanjena u Sarajevu	2,00%

4. Nadzorni odbor Društva

Član 31.

Članovi Nadzornog odbora Društva su:

Adnan Terzić, predsjednik Nadzornog odbora Društva, dipl. Inženjer geodezije; rođen 05. 04. 1960. godine u Zagrebu, Republika Hrvatska. Diplomirao je na Građevinskom fakultetu, odsjek geodezije Univerziteta u Sarajevu. Predsjedavao je Vijećem ministara BiH od 2003. do 2007. godine, a u dva mandata je bio guverner Srednjobosanskog kantona - od 1997. do 1998. godina te od 2000. do 2001. godine. Od 2007. godine do 2008. godine je radio u Investicijskoj banci FBiH d.d. kao savjetnik generalnog direktora, a posljednje dvije godine obnaša dužnost potpredsjednika Koncerna Agram.

Šaban Bajro, dipl. oec, član Nadzornog odbora; rođen 09. 05. 1964. godine u Trnovu, Bosna i Hercegovina. Završio Ekonomski fakultet u Sarajevu 1988. godine i ima 21 godinu radnog iskustva u struci. Od 2000. do 2003. godine je obnašao dužnost zamjenika generalnog direktora „Avaz“ d.o.o. Sarajevo, a do 2005. godine generalnog direktora Grafičko-izdavačke kuće „OKO“ d.d. Sarajevo. Od 2005. do 2008. godine je radio u „Avazu“ d.o.o. kao generalni direktor društva, a posljednju godinu je prokurista društva.

Kasim Mujan, dipl. oec, član Nadzornog odbora; rođen 20. 12. 1959. godine u Mostaru, Bosna i Hercegovina. Završio Ekonomski fakultet u Mostaru 1984. godine i ima 25 godina radnog iskustva u struci. Certificirani je računovođa, ovlaštenu revizor i investicijski savjetnik. Iskustvo u nadzornim odborima je stekao u slijedećim društvima: Mostar Film d.o.o., Sarajevotekstil d.d., Pak Centar d.d. i Modna konfekcija d.d. Iskustvo u odborima za reviziju je stekao u slijedećim društvima: Zavod za vodoprivredu d.d., Hoteli Iliđa d.d., G.P. Igman d.d., IF Bosfin d.d. i Poljoprema d.d. Sarajevo. Od 1998. do 2003. godine je obnašao dužnost direktora "EMAM BCG" d.o.o. Sarajevo, a od 2004. godine je direktor NovaCapital d.o.o. Sarajevo.

5. Uprava Društva

Član 32.

Članovi Uprave Društva su:

Armin Mulahusić, dipl. oec., direktor Društva; rođen 05. 09. 1973. godine u Sarajevu, Bosna i Hercegovina. Ekonomski fakultet u Sarajevu završio 1997. godine, gdje je diplomirao poslovnu ekonomiju, smjer Finansije i računovodstvo, na temu "Centralna banka - Currency Board u BiH". Ovlašteni je predavač Federalne agencije za privatizaciju i posjeduje zvanja investicijski savjetnik i broker. Ima preko dvanaest godina radnog iskustva, a posljednjih deset godina na poslovima investicijskog bankarstva i fondovske industrije. Od 2000. do 2005. godine obnašao je dužnost direktora PIF Eurofond d.d. Tuzla, a do 2006. godine je radio u Hypo Alpe-Adria Bank d.d. Mostar kao voditelj Odjela investicijskog bankarstva. U „EUROHAUS INVEST“ Društvu za upravljanje fondovima d.o.o. Sarajevo radi od početka 2008. godine kao direktor Društva.

Lejla Smalbegović, dipl. oec., izvršni direktor Društva; rođena 21. 02. 1971. godine u Fojnici, BiH. Diplomirala je na Ekonomskom univerzitetu u Sarajevu i stekla zvanje diplomirani ekonomist. Certificirani investicijski savjetnik je od 2006. godine. Ima deset godina radnog iskustva u Bosni Hercegovini, od 2005. godine je radila u brokersko-dilerskoj kući „Eurohaus“ d.o.o. Sarajevo u odjelu za trgovanje vrijednosnim papirima-brokerski poslovi i u odjelu interne kontrole-interni kontrolor. U „EUROHAUS INVEST“ Društvu za upravljanje fondovima d.o.o. Sarajevo radi od početka marta 2010. godine.

ODGOVORNOST DRUŠTVA

Član 33.

Društvo je odgovorno isključivo za uredno i savjesno obavljanje djelatnosti osnivanja i upravljanja Fondom u skladu sa odredbama Zakona, drugim mjerodavnim propisima, te Prospektom i Statutom Fonda.

Društvo će se u zasnivanju ugovornih odnosa i ostvarivanja prava i obaveza iz tih odnosa pridržavati načela savjesnosti i poštenja, te pri izvršavanju obaveza Društva postupati profesionalno, s pažnjom savjesnog privrednika, te prema pravilima struke, dobrim poslovnim običajima i pozitivnim zakonskim propisima, nezavisno od banke depozitara Fonda, te isključivo u interesu vlasnika.

Član 34.

Društvo ne preuzima nikakvu dodatnu odgovornost za poslovanje Fonda i ne garantuje vlasnicima dobit niti povrat glavnice. Društvo ne odgovara za rezultate poslovanja Fonda koji su posljedica odluka Društva donesenih u skladu sa Zakonom, Prospektom i Statutom Fonda.

Društvo također ne preuzima odgovornost za pravilno upravljanje društvima u čije vrijednosne papire ulaže.

Član 35.

Društvo samostalno donosi poslovne odluke, te ulaže sredstva Fonda u finansijske instrumente isključivo na osnovu praćenja, analiza i vlastitih procjena tržišnih kretanja, te javno dostupnih informacija o poslovanju emitenata vrijednosnih papira kojima se trguje na berzama i drugim organiziranim tržištima vrijednosnih papira.

POSLOVNA TAJNA

Član 36.

Poslovnim tajnom Društva smatraju se sve one isprave i podaci vezani za poslovanje Društva i Fonda čije bi saopštavanje neovlaštenim osobama bilo suprotno interesima Društva i vlasnika udjela ili se Zakonom ili drugim propisima smatraju poslovnim tajnom.

Poslovnim tajnom u Društvu smatraju se naročito podaci o vlasnicima udjela, o veličini i vrijednosti njihovih udjela, te o broju uplaćenih i isplaćenih udjela vlasniku.

Član 37.

Članovi Društva, članovi Uprave i Nadzornog odbora, sve osobe koje su zaposlene u Društvu ili za njega obavljaju stalne ili povremene poslove na temelju posebnog ugovora, dužni su čuvati poslovnu tajnu. U protivnom, odgovorni su Društvu za nastalu štetu zbog odavanja poslovne tajne.

Član 38.

Izuzeci čuvanja poslovne tajne su zakonom predviđene obaveze davanja podataka i izvještavanja Komisije, saopštavanje podataka na osnovu sudskoga naloga, zahtjeva određenog vlasnika i banke depozitara Fonda.

PRELAZNE I ZAVRŠNE ODREDBE

Član 39.

Izmjene i dopune odredbi ovog Statuta donosi Nadzorni odbor Društva, uz prethodnu saglasnost Komisije za vrijednosne papire FBiH, a na način određen Zakonom.

Član 40.

Na sporove koji proizlaze iz primjene ili tumačenja ovog Statuta primjenjuje se pravo Bosne i Hercegovine, a za rješavanje sporova nadležan je sud u Sarajevu.

Član 41.

Odobrenje Statuta i svih njegovih izmjena i dopuna od strane Komisije za vrijednosne papire FBiH predstavlja uslov valjanosti i primjene Statuta Fonda.

Komisija za vrijednosne papire FBiH je dala prethodnu saglasnost na ovaj Statut.

Ovaj Statut stupa na snagu danom donošenja.

Broj: 444/2011

Sarajevo, 26.05.2011. godine

PREDSJEDNIK
NADZORNOG ODBORA



Adnan Terzić, dipl. geodeta

